

REKELE

Rede des neuen Ordensträgers Heinz Gilges anlässlich der Verleihung des Rekeliserordens am 11. Januar 2008

Ech will hüt ens nit eso direkt rekkele, sondern ech meut mech möt dem Thema Rekele - quasi wissenschaftlich- usereen setzte.

Also, och nit genau möt Rekele, mie möt d´r Behauptung : Rekele is en nüsser Eigenart, stimmt dat überhaupt ?

Dat kammer wal sage. D´r Nüsser, also wenn et ne richtige Nüsser is, d´r Nüsser an sich, rekelte immer un überall. Jede Nüsser hät et Rekelieser verdint. De eene mie, de angerer winiger. Alles un jeder wöd op de Schüpp jenohme - un manchmol sich selver och. Et wöd ständig eröm jestochert, nit esu direkt, mie so hinger de vörjehaldene Hank. Rekele es nit et selve wie Stunk, et es eve en Nüsser Eijenart.

Un dröm meut ich hüt , wie jesäht , nit ens övver de Politik un su rekele, (m´r hätt sich flöck jenug de Schnüss verbrannt), sondern övver däm, de et wirklich verdent hät, övver d´r stink normale Nüsser.

D´r Homo Nussiensis, das rekelhafte Wesen.
Un weil et Rekele däm Nüsser quasi von Jeburt jejove es, jenießt et och son Wertschätzung, dadet doför ne Orde jüt.

Un wenn rekele en Nüsser Eijenart es, dann mösser mer uns eesch ens möt der Frog beschäftigt, we es d´r Nüsser, wo kütte her, wat hätte füne Stammboom?

„Et jüt joode Minsche, schleite Minsche - un et jüt Nüsser“. So sage die angere.

Se sage och „Ne joode Koofmann es ne schleite Koofmann“ wat so vüll heeße will, wennsde als Koofmann joot sin wills, dann musse en gewisse Schleitigkeet als Minsch han, verstodder wat ech meen? Un die Nüsser sind jo alles joode Kooflüt.

Also so jesin is d´r Nüsser ganz normal, äwver normaler als die normale Normale.

He weeß immer, wie et nit jeht, he is stolz, weeß ävver nit genau wodrup un is ne joode Chris, ävver nur, wenn et nit wieh däht, denn et Jeschäft jeht vör.

E es möt jedem Fründ , ävver bim Jeld höt de Fründschaft op. He es och för Kunst un Kultur, ävver nur wenn et nix kost.

Also, nu zu der Frog, wo kütte her?
Ech will jetz nit zu wiet uthole, fange m´r , -wie en Nüss övlich-, eesch bi de Römer an. Die ganz alde Nüsser, säht Caesar, dat woren Eburonen, ne keltische Volksstamm. un e hei die all kapott jeschlage, weil die nit pareeden.

Stimmt nit, sage de Wissenschaftler, ischtens hei hee e keltisch germanisches Mischvolk jesse un zweddens wören die nit utjerottet woode, denn sons heie die alde Ortsnöhm de Ziet nit üvverlevt. Mischvolk, dat isset

Stichwort, de Urahne schon e Mischvolk. Un die üvverlevt hant, die hant sich halt arrangeet möt denne Römer.

Jo, un die Römer, die kohme jo och nit us Rom. Ne, wat wor dat fünne dörchenangere Hoope. Spanier, Franzuuse, Ungarn, sogar Ägypter sät m´r. Wenn dat kin Promenademischung wor. Von allem jet. Öm do zesame ze waaße , mot m´r sech wirklich anrangeere künne.

Trotzdem, von de Eburone wollde d´r spöderer Nüsser nit avstamme, lieber von de Römer, he wolltene Siegertyp sin. Dröm jüt et hüt zwor en Keltestroot, ävver nit speziel en Eburonestroot, -ävver en Römestroot-. Un möt de Römer wor och joot Handel drieve, in de Lagervörstadt un he em Vicus.

Denn die alde Nüsser woren, wie jesäht, von Anfang aan Kooflüt. Händler un Krämer, och schon in de Römerziet.

För de Ärbeet hant se sech von de angere Rhingsid de Ubier jeholt, un weil die fleißig wore, hant die och en Stroot jekritt. De Ubierstroot.

Un för Zaladat ze spelle, hant se vom Niederhing noch de Bataver dobee jedonn. Evver, weil die nit son rühmlische Roll jespillt hant, (von weje Bataveraufstend) hant se zwar och en Stroot jekritt, evver nit in bester Lage. De Bataverstroot.

So, dat wor nu d´r ischte Nüsser. Stolz, ärbeetscheu, drinkfest un jet jerrisse, wie der Wissenschaftler festjestellt hät. Hervörjange ut nem Mischtiigel verschiedenster Völker, e Cuvee jewissermoße us schwerem Södwing, spritzigem Moselwing, deftigem Met un ne Schuss lecker Alt wor secherlich och möt en Spil.

Also, we de Römerziet üvverlevt hät, dem söke se zwar noch, evver et wede schon e paar jewess sin, sons, wie jesäht, sons wör d´r Nohm nit jeblivve. Novaesium - Nussia - Nüss. M´r vermutet, dat en Koofmannssiedlung jeblivve es.

Un dann kohme se wier von de angerer Rhingsit, uutjerechnet von Düsseldorf, dat jovet zwar noch nit, evver ejal, et es doch immer et selve wat von dröve kütt, so wolle uns an et Zeug. Un dröm kammer nit vörsichtig jenug sin.

„Mer sind schon he!“ hant die Nüsser jeseht „un mer sind Kooflüt, mer müsse he am Hafe sitze, ävver er künt jo die alde Burehöff von de Römer han un de Ärbeet donn un och Zaladat spille. Do hammer janix jen.“ Un so hant se sech wier arrangeet.

Die do von Düsseldorf kohme, dat wore de Franke, Merowinger un Ripuarier, sind spöder all jooe Nüsser jewode und hant all er Stroot jekritt. Kennder jo, Frankestroot, Merowingerstroot, Ripuarierstroot. Von denne,- säht m´r-, heie m´r ne ödentliche Jutsch em Bloot drin.

Jo, dann kohme allerdings de Normanne un die hant dann alles wier kapott jeschlage, ob se och em Nüsser Blot Spure hingerlote hand, weiß m´r nit, en Stroot hand se zwor jekritt, evver verdint handse die nit.

Un dann kohme vom hillige Kölle die janze Nonne und Mönche un

bauden övverall Klöster, brauden lecker Bier un bruchten jede Menge Wing, un dröm kunde mer möt denne och joode Jeschäfte mache. Ob die dann och zur Vermischung des Nüsser Wesens vüll bejedraaje hant, dat weefß m´r nit. Diesbezöglische Jerüschte halde sech jo büs hüt. Ejal, er Stroote hant se jenfalls jekritt. Klarissestroot. Kapitelstroot, Klosterjass, Jesuittehoff, Stiftsjass, - m´r kann se janit all opzälle -

Un die Abtissin Gepa hät dann ut Rom de Knöckskes vom hillije Quirinus jeholt un dat wor joot für Nüss un noch besser för et Jeschäft. Janze Piljerschare troke no Nüss un hant et Jeld hee jeloote. Kloor dat dat Gepa och en Stroot jekritt hät, nee, sojar ne Platz un zwar bei de Römer in Jnadethal.

Un öm die schöne Sadt nit noch ens ze verleere, hant se dann die jroote Muur drömeröm jebaut

D´r Nüsser wor so möt d´r Ziet ne rische Mann jewode un dat hät Karl d´r Kühne op der Plon jebreit

„Hölp, Hölp, de will uns alles avnehme, die Stadt muß verteidigt wede, mer müsse Kreeg föhre, äwwer we soll dat för uns donn?“ „ Ich weefß et, d´r Hesse.“

Un möt Quirines Hölp hätte d´r Kreeg jewonne, un dröm hätte och sin Stroot jekritt , de Hesse Stroot. Un de Quirines hätt och sin Stroot jekritt, de Quirinusstroot. Un die gerissene Nüsser hant däm Kaiser Friedrich mänch Privileeg avjeschatz, zum Dank hät de dann och sin Stroot jekritt, de Kaiser Friedrich Stroot.

Jo, op de ruhmriche Kreeg sin se hüt noch düchtig stolz, äwwer wat dono kohm, do kalle se nit jehr drüwwer oder hant et enfach verjesse, weil dat nit esu ruhmreich wor, em truchsessiche Kreg. Irjend eene hät verjesse, de Pootz zo zemache. Et soll jo Veroot em Spell jewess sin. - Et jütt ävver och Aanjeboote, do kannsse enfach nit nee sage -. Jenfalls joved do kin Stroot för. Ävver irjentwie het m´r sech hingernoh och wier arrangeere mösse.

Nu wor d´r typische Nüsser fast fehdig, e deftig Jebraü, oder sage m´r ens, de Stammwürze qasi, die sech dann innerhalb d´r Stadtmure wie inem Braukessel so richtig entwickele kunt.

Jo, wemmer sech dat ens genau üvverläht, son kleene Stadt un dann möt son groote Muur drömeröm und dann et ovends noch de Pootze zojemäht un de Bürgersteege hochjeklappt, jo wo soll dann do d´r Wietblick herkoome, dat es doch klor, dat m´r do jet kleenbürjerlich blit, öm nit spießbürjerlich ze sage, do mut m´r doch Verständnis för han.

- Evver d´r Wietblick kann jo noch kohme. Dat Bier wat d´r spödere Nüsser ens weede soll, es jo noch nit janz fehdig.

D´r Franzuus es dann doch noch ens wier jekohme, diesmol möt Napoleon, de wor ,wie schon Karl d´r Kühne, och nit eso beliebt , hät dröm och kin Stroot jekritt, -nur de Trottewars solle von em avstamme - - Joot, för sinne Nordkanal hätte en Allee jekritt, evver sons nix -.

Zur Vermischung des Nüsser Wesens ävver hät d´r Franzuus bestimmt düchtig bejedrage, von weje de Visematentsches un de Fisternöllches.

Un de hätt och die Klöster objelöst un alles veramscht, wat nit Niet und Nagel fest wor. Un do kunt m´r wier joode Jeschäfte mache, vöredraan die rische Bure usem Ömlank, die manch Schnäppche jemaat hant. - m´r mot sech jo arrangeere könne - un die hant dann och in Nüss et Rejiment üvvernahme un de Stadt groot jemaat. Un hant d´r Haave uutjebaut.

Doföör hant se allerdings Heedt an Düsseldorf verkloppt. Jo, bim Jeld hüt nit nur de Fründschaft op, och de Feindschaft. Däm Kehl, de dat Ding jedriecht hüt, hant se och ne Platz jejove - evver die Düsseldorfper natürlich - d´r Nicolaus Knopp Platz.

Die Buure sind och typiche Nüsser jewode, jo noch typischer un jrüliger als die alde schon wore, un noch bessere Kooflüt un dröm hant se och e paar Stroote jekrit, zum Beespel de Thywissestroot un de Kallejass.

Die Werhahns hant jo kin Stroot jekritt, die hant et vielleicht och bitzke üvverdrive oder die Nüsser hant jesät, die könne sich jo en Stroot koofe. Un dat deht d´r Werhahn jo nit, do kennt m´rm jo för.

So, nu wore fehdig, d´r alde Nüsser, wie mer´m kennt, wie e rekelt un berekelt wöd un wie ech´m injangs beschrive han.

Kammer stolz drup sin ? Kammer so sin un so. Ech meen jo. D.r Rassist wöd nee sage. Die Nazzziet, die jov et jo nu och in Nüss. D´r Nüsser wor och deelwieß en de Partei, evver kinne Nazi. Öm Joddes Wille, wo dengder dann hin, evver, wie jesäht, m´r mot sech jo arangiere könne, sons mache angere et Jeschäft.

Joot, kalle m´r hüt nit drüvver. Strootenöhm jowed jenfall domols och, evver die sind jetzf wier fott - genau wie de Erinnerung.

De Ziet blit nit stonn un vüll neue Lütt hant in Nüss Heimot jefunge. Zueesch kohm d´r Flüchtling un dä es och ne joode Nüsser jewoode - möt d´r Ziet. - un drömm hätte och e paar Stroote jekritt, Schlesierstroot, Pommernstroot - woröm et jetz kin Ostpreussestroot jüt, dat weeiß ech och nit -

Donoo kohme de Jastärbe´er un möt denne es och d´r Römer höösch wie´r no Nüss jekohme, nit als Zaldat, ne als Iesmann oder als Pizzabäcker. Hät zwar noch kin Stroot jekritt, is evver sehr beliebt. Wenn d´r Nüsser ens uutjeht, - wat selde vörkütt - dann jehte no´m Italiener.

Och be´m Türk kammer janz joot esse un m´r wolle hoffe, dat de och ens ne joode Nüsser wöd. Ävver do mut m´r sech wall noch arrangeere. Joot, wenn noch jet Wasser d´r Ring erunger jeloop is, dann wed dat wall och klappe.

Ech sag ens so: Dont Napp un Patt sech jot verdrage,
wöd m´r zum Türk och Nüsser sage,
küt Ziet küt Root,
küt Rot küt Stroot.

Jo, dat isse nu, d´r jetzije Nüsser, von allem e Dröpche. Möt schwatte Hoor, möt blonde Hoor un och schon ens jet fussig. Möt helle Huutfärv un och ens jet brung jetönt.

Letz sät ens eene vör mech, „ saht ens, üre Bürjermeester, es dat ne Inder“ „Ne Inder, Jo, wie kudder dan dodrup?“ sag ech. - Joot, sinne Rejierungsstil hät jo jet vonne Maharadscha, un wenn de Parias opmucke, dat kanne nit joot verdrage. Ävver Drecksäck, dat hät de nit jesäht, do hätte ne angere för jehat. Un de es dann jo zerück jetrone on ne angere dit si Pösstje af „sahnen“. (Nur e Wortspel)

Joot, ech wollt jo hüt nit politisch wäde.

D´r Nüsser müste an sich ne weltoffene Typ sin, von dem Völkerjemisch her, Secher, e es jet eigen, weltoffen kammer nit jrat sage, ever versteht sech möt jedem, wenn e nit jrat ut Düsseldörp küt. Un d´r Wietblick löt nach wie vör noch jet op sech waade.

E kallt miest drei Sproche: Deutsch – Nüsser Platt – un „Üwwer angere Lüt“. Un dat „üwwer anger Lütt“, dat es dann meistens rekele.

Also, wat ech möt dem janze Verzäll sage wollt, dat d´r Nüsser so es, wie e es, do kann e selvs janix doför, dat sind eves die janze jemischte Vörfahre schold, un die jroote Stadtmure, die öm d´r Wietblick versperren.

Un sin allseits bekande Krämerseel, die so typisch för d´r Nüsser es, un die flöck ens an Jitz un Jrühl jrenz, die hätte och dovon. Un weile ne jeborene Krämer is, jüddet selvsverständlich och en Krämerstroot, un zwar in allerbesten Lage. Un sinne Hang zum Rekele, dat hängt selvsverständlich och möt all dem zesame.

So, er Nüsser, so sin ech üch, wie en Famillisch, die m´r sech zwar nit uutsöke kann, die m´r ever von Hetze jehr hät. Un weil ech eves och zu d´r Famillisch jehör, rekel ech ,- wie jesäht - och jehr und dröm han ech doför ansich jakinne Orde verdint.

Ävver wenn ech em dann krieje soll, weil, wenn ech rekele donn, kinnem domöt richtig wieh donn will, nee, nur d´r Speegel vörhalde meut, un dat nur en der Jewisshet, dat m´r all nur Minsche- un nit perfeckt sind, - un weil ech partuu nit liee kann, wenn do eene mint, he hei alleen de Wiesheet möt Löffele jefresse ,

also, wennet dovör es, dann nöm ech em jehr an, d´r Rekelieserorde, un ech bün dann och mächtig stolz drop, nu zu däm „Ordenskapitel der ehrenwerten Ritter des Rekeliser“ dozo zo jehüre.

Ech jlööv, ech han mech op d´r alde Daag och jet arrangeet.

Un ech denk en däm Zesaamehang janze besonders an eene von min ritterliche Vörjänger, an minne alde Fründ un Künstlerkolleg Peter Hermann jenannt Pit Schütz, dessen Lebenswerk leider un zu Unreit em Verborjene blitt.

So, Ihr Lieben, m´r sind he bei de Brauchtums- un Karnevalsgruppe der Heimatfründe un dröm zum Schluß noch drei kleene Jedichte övert Nüsser Brauchtum - Sommerbrauchtum un Winterbrauchtum - un övver en leichte Diskrepanz tüsche Aanspruch un Wirklichkeit, eech meen - tüsche Jlaube, Sitte un Heimot un - allzejröote Doosch - . Brauchtum und Brauwesen sind in Nüss

eves sehr enge Verwandte un ech freu mech schon, dat et bahl wier en ejene Brauerei in Nüss jüt. Wod jo och Ziet.

Also, dat ischte Jedicht, weil ech ne staatse Nüsser Jrenadier bün un och schon ens et ovends dem Kampfjetümmel erlege wor.

Dat zwedde, weil m´r jo midde en de Fastelovendsziet sind

un dat dridde, weil et beschrift, wie d´r knausrige Nüsser trotzdem op sin Freud kütt.

Jedichte: D´r staatse Jrendier Fastelovend Lauschepper

Jo, un in diesem Sinne kömmer jo nur dankbar sin, dat m´r hüt he ömsüns erin jekohme sind, dröm es d´r Saal och voll. Vüll Freud noch.